

OHR i OECD organizirali konferenciju o regulatornim tijelima

Regulatorna agencija za komunikacije, Regulatorna agencija za bankarstvo i druga nezavisna regulatorna tijela su sastavni i neophodan dio transformacije privrede u BiH, naveo je Patrice Dreiski, zamjenik visokog predstavnika i šef Odjela za ekonomska pitanja pri OHR-u, na konferenciji koja je održana danas u Sarajevu.

Efikasna regulatorna tijela su preduslov za privlačenje stranih ulaganja i osiguravanje uspjeha privatizacije, naveo je g. Dreiski. Ulagачi neće rizikovati novac na tržištima gdje su regulative elastične ili gdje se različita pravila primjenjuju na različite aktere.

Zamjenik visokog predstavnika je govorio na Konferenciji o regulatornim tijelima, koju su zajednički organizirali OHR i Organizacija za ekonomsku saradnju i razvoj (OECD). Na Konferenciji su se obratili i drugi govornici, uključujući Dragana Mikerevića, predsjedavajućeg Vijeća ministara, i Azru Hadžiahmetović, ministricu vanjske trgovine i ekonomskih odnosa.

“Regulativa pomaže funkcioniranju tržišta tako što osigurava da prirodni monopoli potrošačima nude optimalne cijene i usluge, kao i osiguravanjem da se u strateškim sektorima, kao što su komunalije, uspostavi ravnopravna tržišna utakmica koja će preduzećima omogućiti da funkcioniraju prema pravilima pravične konkurencije”, rekao je g. Dreiski.

U vezi sa nezavisnošću i odgovornošću regulatornih tijela, g. Dreiski je konstatirao da je “posao onih koji donose odluke da utvrđuju politiku, a to moraju raditi za regulatorna tijela. Nakon toga, moraju pustiti regulatorna tijela da rade svoj

posao. Regulatorno tijelo je odgovorno potrošačima, poreskim obveznicima i vlastima. Uz jasno definiran mandat i jasno definirane parametre diskrecije, regulatorno tijelo može zadržati svoju nezavisnost i autoritet, te istovremeno odgovoriti efikasno na zadate smjernice”.

Gospodin Dreiski je dodao da je uspostava efikasnog regulatornog režima u BiH preduslov za približavanje evropskim integracijama. “Kao i u slučaju svih ostalih pitanja iz Smjernica Evropske unije, ovdje se ne radi samo o ispunjavanju uslova za prijem u svrhu njihovog ispunjavanja”, naveo je g. Dreiski. “Ovdje se radi o implementiranju odluka koje BiH vode bliže Evropi i istovremeno donose korist građanima”.